

FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
PREDSTAVNIČKI DOM
KLUB NEZAVISNIH ZASTUPNIKA
ZLATKO ERCEGOVIĆ

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 09-03-2022			
Org. jed.	Broj	Priloga	Vrijednost
01-	02-	2057	/19

n/r gosp Mirsad Zaimović . Predsedavajući

U skladu sa Ustavom Federacije BiH, a na osnovu člana 163. i 184. Poslovnika o radu Predstavničkog doma Parlamenta FBiH (Službene novine Federacije BiH br 69/07 i 02/08) podnosimo Amandman na Prijedlog Zakona o dopuni Krivičnog zakona FBiH.

**FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
PREDSTAVNIČKI DOM
KLUB NEZAVISNIH POSLANIKA
POSLANIK ZLATKO ERCEGOVIĆ**

**PRIJEDLOG ZA IZMJENU I DOPUNU (AMANDMAN)
PRIJEDLOGA ZAKONA O DOPUNI KRIVIČNOG ZAKONA
FEDERACIJE BOSNE I HERCEGOVINE**

Sarajevo, mart, 2022. godine

**PRIJEDLOG ZA IZMJENU I DOPUNU
PRIJEDLOGA ZAKONA O DOPUNI KRIVIČNOG ZAKONA
FEDERACIJE BOSNE I HERCEGOVINE**

Član 1.

U Prijedlogu Zakona o dopuni Krivičnog zakona Federacije Bosne i Hercegovine u članu 1. naziv novog člana 359a. mijenja se i glasi:

“Član 359a.

Prisila prema zdravstvenom radniku”

U stavu (1) iza riječi: “spriječi u obavljanju njegove zdravstvene djelatnosti”, dodaju se riječi: “ili ga prisili na izvršenje postupka ili intervencije koji nisu u skladu sa pravilima medicinske struke ili etike”.

OBRAZLOŽENJE PRIJEDLOGA ZA IZMJENU I DOPUNU ZAKONA O DOPUNI KRIVIČNOG ZAKONA FEDERACIJE BOSNE I HERCEGOVINE

Prijedlogom Zakona o dopuni Krivičnog zakona Federacije Bosne i Hercegovine u Krivičnom zakonu Federacije Bosne i Hercegovine („Službene novine Federacije BiH“, br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17) u GLAVI XXX – KRIVIČNA DJELA PROTIV JAVNOG REDA I PRAVNOG PROMETA, iza člana 359. dodan je novi član 359a., koji glasi:

„Član 359a.

Sprečavanje zdravstvenog radnika u vršenju zdravstvene djelatnosti

(1) Ko doktora medicine, doktora dentalne medicine ili drugog zdravstvenog radnika koji zdravstvenu djelatnost obavlja kao javnu službu silom ili prijetnjom da će izravno upotrijebiti silu spriječi u obavljanju njegove zdravstvene djelatnosti, kaznit će se kaznom zatvora od tri mjeseca do tri godine.

(2) Ako je krivičnim djelom iz stava 1. ovoga člana doveden u opasnost život ili tijelo doktora medicine, doktora dentalne medicine ili drugog zdravstvenog radnika ili mu je nanesena tjelesna ozljeda ili je upotrijebljeno oružje ili opasno oruđe, učinitelj će se kazniti kaznom zatvora od šest mjeseci do pet godina.

(3) Ako je učinitelj krivičnog djela iz stava 1. i 2. ovoga člana bio izazvan protuzakonitim ili grubim ponašanjem doktora medicine, doktora dentalne medicine ili drugog zdravstvenog radnika može se osloboditi kazne.“

U obrazloženju pomenutog Zakona ponuđeni su razlozi za donošenje istog, a koji se prvenstveno ogledaju u činjenici da u posljednje vrijeme svjedočimo sve češćim napadima na zdravstvene radnike u FBiH, odnosno da su zdravstveni radnici izloženi raznim vrstama pritisaka, prijetnji, verbalnih pa čak i fizičkih napada od strane nezadovoljnih pacijenata i članova njihovih porodica, što šteti njihovom psihičkom i fizičkom zdravlju i njihovoj efikasnosti, a za posljedicu ima i ugrožavanje kvaliteta i pristupačnosti pružanja zdravstvene zaštite građanima ili im čak može direktno ugroziti život, jer napadnuti zdravstveni radnik npr. u hitnoj službi nije u mogućnosti pružiti adekvatnu liekarsku pomoć, a time ni zdravstvenu zaštitu.

Međutim, pomenutim Prijedlogom Zakona radnja počinjenja ovog krivičnog djela se sastoji samo u sprečavanju zdravstvenog radnika u obavljanju njegove djelatnosti, dok nije predviđeno da krivično djelo predstavlja i prisila zdravstvenog radnika na izvršenje postupka ili intervencije koji nisu u skladu sa pravilima medicinske struke ili etike. S obzirom da se i ova situacija dešava u praksi, te da i ona predstavlja opasno ponašanje, mišljenja sam da istu također treba predvidjeti kao kažnjivu u Krivičnom zakonu FBiH. S tim u vezi, ovim amandmanom

mijenja se naziv novog člana 359a. iz predloženog naziva: "Sprečavanje zdravstvenog radnika u vršenju zdravstvene djelatnosti" u: "Prisila prema zdravstvenom radniku", a stav (1) istog člana dopunjava se na način da se iza riječi: "spriječi u obavljanju zdravstvene djelatnosti", dodaju riječi: "ili ga prisili na izvršenje postupka ili intervencije koji nisu u skladu sa pravilima medicinske struke ili etike", dok u ostalim dijelovima ovaj član ostaje nepromijenjen.

Uz uvažavanje izmjene predložene ovim amandmanom, član 359a. bi glasilo:

"Član 359a.

Prisila prema zdravstvenom radniku

(1) Ko doktora medicine, doktora dentalne medicine ili drugog zdravstvenog radnika koji zdravstvenu djelatnost obavlja kao javnu službu silom ili prijetnjom da će izravno upotrijebiti silu spriječi u obavljanju njegove zdravstvene djelatnosti ili ga prisili na izvršenje postupka ili intervencije koji nisu u skladu sa pravilima medicinske struke ili etike, kaznit će se kaznom zatvora od tri mjeseca do tri godine."

(2) Ako je krivičnim djelom iz stava 1. ovoga člana doveden u opasnost život ili tijelo doktora medicine, doktora dentalne medicine ili drugog zdravstvenog radnika ili mu je nanesena tjelesna ozljeda ili je upotrijebljeno oružje ili opasno oruđe, učinitelj će se kazniti kaznom zatvora od šest mjeseci do pet godina.

(3) Ako je učinitelj krivičnog djela iz stava 1. i 2. ovoga člana bio izazvan protuzakonomitim ili grubim ponašanjem doktora medicine, doktora dentalne medicine ili drugog zdravstvenog radnika može se osloboditi kazne."

Rješenje predloženo u Prijedlogu Zakona o dopuni Krivičnog zakona FBiH identično je djelu koje egzistira u zakonodavstvu Republike Hrvatske. Međutim, zakonodavstvo ove države predviđa i zasebno djelo "Prisila" kojim je predviđeno da će se kazniti ko drugog silom ili ozbiljnom prijetnjom prisili da što učini, ne učini ili trpi, nije bilo potrebe da se u biće krivičnog djela "Prisila prema zdravstvenom radniku" kao jedan od načina počinjenja istog predvidi i prisiljavanje zdravstvenog radnika na izvršenje određene intervencije ili postupka. S obzirom da Krivični zakon FBiH ne predviđa prisilu kao zasebno djelo, to je bilo potrebno da se i prisiljavanje zdravstvenog radnika na izvršenje intervencije ili postupka koji nisu u skladu sa pravilima medicinske struke ili etike predvidi kao jedan od načina izvršenja predloženog djela, kako bi se osiguralo kažnjavanje i ovog ponašanja.

S tim u vezi, ovim amandmanom se upotpunjava rješenje predloženo Prijedlogom Zakona o dopuni Krivičnog zakona FBiH, zbog čega je neophodno njegovo prihvatanje.